



UKA 2013/59  
10. oktober 2013  
Juliane Henningsen

**Meerartaarnermut atatillugu Nunatsinni tulluarsakkamik aningaasaateqarfiliornissamut periarfissanik misissuinissaq siunertaralugu Naalakkersuisut suliffeqarnermik suliaqartunut isumaqatigiinniarnissamik aallarnisaanissaannut pequneqarnissaannik Inatsisartuni aalajangiiffigisassatut siunnersuut. Meerartaarnermut atatillugu aningaasaateqarfiup akissarsiallit tamakkerlutik maanna ullormusiaqartitsinermit pitsaannerusumik atugaqalernissaat qulakkiissavaa.**  
(Inatsisartunut ilaasortaq Naaja Nathanielsen, Inuit Ataqatigiit)

Inatsisartut, erninermi aningaasaateqarfik eqqartussallugu siullermiilingillat. Inatsisartunut ilaasortap Naaja Nathanielsen-p arlaleriarlugu angajoqqaanngorlaanut atugaannik pitsanngorsaaneramik ujartuisimavoq. Nunatsinni Erninermi aningaasaateqarfeqarnissaa isumaqatigiissutaareernikuuvoq, nunat allat assigalugit. Taamaammat takusaqarusulerpugut oqaatsit kusarnartut anninneqartartut piviusunngortinneqarnissaannik. Angajoqqaangortut pitsaasumik atugassaqartikkusullugit.

Taamaammat siunnersuut isumaqatigaarput. Nunatsinni meerartaarnerq imaassanngilaq aningaasatigut artukkerfiusoq.

Ilisimavarput suliffeqarfiit akornanni Erninermi aningaasaateqarfik pillugu eqqartorneqartartoq, suliffeqarfinnut namminersortunut, pisortallu suliffeqafiutaani atorneqartussanik innersuussutigineqarpoq erninermi sulinngiffeqarnermi aningaasaateqarfeqalissasoq, suliffeqarfiit namminersortut inatsisitigut akileeqataaffigisaannik, tassa suliffeqarfiit nammi-nersortut sulisumut ataatsimut aaliangersimasumik akiliuteqaqataaffigisaannik.

Naaja Nathanielsen-ip siunnersuutiminut tunngavilersuutaanut ilaavoq, ullumikkut erninermi sulinngiffeqarnermi periarfissaasut iluini, angajoqqaaraqarmat tamakkiisumik atuinissaminnut akissaqartitsinngitsunik, siunnersuutikkullu ugguna tamanna aqqiivigi-niarneqarpoq.

Siunnersuutikkut aamma anguniarneqarpoq, agguaaqatigiinneq ikioqatigiiffiunerusoq sulisitsisut, sulisullu akornanni, aningaasartuutit erninermi sulinngiffeqarnermi eqqarsaatigalugit. Nalunnginnatsigu suliffeqarfiit namminersortut mikinerusut, aningaasartuutitut taamaattunut akiliinissaminnut akunnartoorsinnaasunik.

Siunnersuut una taakkununga tapersiutaavoq. Ingammik uulluni makkunani kikkut tamarmik suliffinnik pilersitiniartunut tapersersuineranni, siunnersuut ersarissumik pilersitiniartunut tapersersuineruvoq.

Nalunngilarput naalungiarsuup inunngornerani, ukioq siulleg pingaaruteqarluinnartuusoq peqqissumik ineriartornissaanut. Angajoqqaanut attaveqarluarneq pingaarluinnartuuvoq timikkut tarnikkullu, inuunerup aallartinnerani misigissutsikkut toqqissisimanermik pilersitsisarmat. Meeraq timikkut tarnikkullu toqqissisimasoq, sunut tamanut akiuussinnaasunngortarmat inuunerup ingerlanerani aqqusaagassanut, tamanna pilersarpoq meeqqap inunngoreernerata kinguninnguani.

Siunnersuutikkut anguniarneqarportaaq, angajoqqat akornanni naligiinnerusumik inuuneqarnissamik, tamanna Inuit Ataqatigiit tunngavilersuutit isumaqatigaarput. Neriupugullu partiit tamarmik akuersaarumaartut.

Taassuma saniatigut ernereernerup kingorna sulinngiffeqartarnerup aqqissuussaanaera eqqarsaatigilluartariaqaripput Inuit Ataqatigiit-ni isumaqarpugut. Erninermi aningaasateqarfik pilersinneqarpat, eqqartorluartariaqarparput, erninermi sulinngiffeqarnermi inatsisip misissorluartariaqarparput, sulinngiffeqarnerup sivitsornissaa anguniarlugu. Ilaqtariit eqaatsumik aqqissuusisinaanissaat eqqarsaatigalugu ernereernerup kingorna sulinngiffeqarnermi, ataataasullu sulinngiffeqarnissaminut peqataalluarnissaa anguniarlugu.

Inuit Ataqatigiit paasisinnaanngilluinnarparput Naalakkersuisut siunnersuummut akuersinngimmata. Naalakkersuisut itigartitsinertik tunngavilersorpaat, Ilaqtariit meerartallit kisiisa aqqiivigerusunnginnamikkitt, apeqqullu taanarpiaq suliffeqarfiit illuatungeriit akornanni aqqiivigineqartariaqartoq. Siunnersuulliuna siunertaqarpiartoq, suliffeqarfiit, siunnersuummut eqqartueqataasasut, taakkorpiaallu siunnersuusioqataasasut model qanoq ittoq nunatsinnut naleqquttuunersoq. Tamanit tikkuarneqartuarpoq, siusinaarluni iliuuseqarneq pingaarluinnartuusoq, nuatsinni inuuniarnermi atugassarititaasut pitsaanerussapata.

Partiit kaammattussavagut siunnersuut ataatsimiititaliamut ingerlateqqullugu, eqqaasitisutigalugulu, 2010 ilaqtariinnermut ataatsimiititaliap isumaqatigiisup allannguutissamik siunnersuutaannut naapertuummat. Taakuullutik Inuit Ataqatigiit, Siumut, Atassut, Demokratillu isumaqataanikut. Taamanikkut una siunnersuut inimi maani akuerineqarpoq.

Siunnersuut akuersaarparput Aningaasaqarnermullu ataatsimiititalianut ingerlateqqullugu. Naalakkersuisullu kaammattorlugit, suliffeqarfimmi illuatungeriinnik oqaloqateqarnerit aallartereeqqullugu. Inatsisartullu, Naalakkersuisunut nalunaarusiamik UPA 2014-mi saqqummiussinissaanik piumaffigissagaat. Taasumalu kingorna inatsisitigut ataatsimoorussamik aqqiissutilik Erninermi aningaasaateqarfimmik siunnersuummik UKA 2014-mi saqqumeeqqusagaat.